



Tir Yimiyim

www.tiryimiyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimiyim@gmail.com

TAPAK 3

Yangia anidakangma :

f Tir Yimiyim

ig tiryimiyim@aolima

yt tir yimiyim

TAPAK 5

'BJP-i sorkar kumtetra constitution shisar intoktsutsu': Gandhi

Bishop Mar Mari Emmanuel-i Tsungrem mapa inyak tenzukogo

VOL. XXI ISSUE NO. 198 (ADOK 198)

DIMAPUR RASEMNU (WEDNESDAY)

MONUPII (MAY) 01, 2024

₹ 5.00

Covishield ajanga timtem adoktsu akok



New Delhi, April 30, 2024 (Agencies): AstraZeneca-i yangluba Covid vaccine ajanga Thrombosis Thrombocytopenia Syndrome (TTS) ta ajaba timtem adoktsu akok ta doctor temi metetdaksuogo.

AstraZeneca-i Oxford University den yaritepa yangluba vaccine ajanga azu atsungdenba timtem (blood clot disorder) ka adoktsu akok ta okadak ashiba sulen iba osang prokshir.

Oxford-AstraZeneca Covid vaccine ya India nung Covishield aser Europe nung Vaxzevria ta ser ayok. Iba vaccine ya modified chimpanzee adenovirus ChAdOx1 amshia yangluba liasü.

Covishield ya India nung Serum Institute of India (SII) den yaritepa yanglu aser India nuntsung yongsuk 90% shi nem agutsuogo.

"Thrombotic Thrombocytopenic Syndrome (TTS) ya kangabo madoker saka timtem tulu agutsur. Nuntsung yongsuk aika alidakbo nisung aika dak TTS ya putettsu akok" ta infectious disease expert Dr. Ishwar Gilada-i ashi.

Immune system ajanga tagizuktsu tim magizukdang TTS ya adoker. Iba ya tapu aikati adoker aser adenovirus vector vaccines den-a sendaktepa lir aser World Health Organization

(WHO)-ia May 27, 2021 nu iba indang report ka adokogo" ta Indian Medical Association nung National Covid-19 Task Force co-chairman Dr Rajeev Jayadevan-ia ashi.

British-Swedish multinational pharmaceutical company AstraZeneca-i tang mezung atema UK court nung parnoki yanglutetba Covid vaccine ajanga blood clot risk adokdaksutsu akok ta nangzükogo.

AstraZeneca indang Covid vaccine ajanga nisung asuba aser kanga mejungi timtem ajuruba indang ken o 51 tashi UK High Court nung benoka lir.

Covishield vaccine agir ajaki shisabulutsu asu ta osangbeneri asungdangdang "Masu, asenoki shisabulu masutsula kechiyong nisung kari dang temang nung iba timtem ya ajurur" ta People's Health Organisation-India, Mumbai Secretary General Dr. Ishwar-i langzu.

"Vaccine ajanga temang nung timtem tulu agutsubaji kangabo mataloker saka iba dang nungibo tajangzuk teimba lir. Covid vaccines ajanga nisung noklang aika tasu nungi kumzükogo. United States nung Covid ajanga nisung 232,000-318,000 asu aser parnok ya vaccine agitsü tsüba magirtem liasü" ta Dr Rajeev Jayadevan-ia ashi.

Kohima Police-i Vehicle Emission tendangtsu

Kohima, April 30, 2024 (DIPR) Kohima nung diesel aser petrol variant garitem tendangba machine ka sayaogo.

April 30, 2024 nu Kohima Superintendent of Police Bharat Laxman Markad, IPS-i AVL 437 DUO Vehicle Emission Checking Machine sayatsü.

Iba sentong nung SP Markad-isa traffic patrol motorcycles 3 sayatsü aser machine den motorcycles ya National Clean Air Programme (NCAP) kubok teyari anguba lir.

Lipoküm asoshi lendong bentsur aruba maparen azuoktsula. Asen lipoküm menentsuba rongnung vehicle emission ya ka lir aser tang nungi police-i vehicle emission norms

mapa inyaktettsu, ta Kohima SP-i ashi.

Emission norms kubok senzuba garitem mita aotsu aser aibelenertem U/S. 190 (2) MV Act kubok temerenshi alitsü. Mezung aibelenba atema ita asem tashi tepuokdak ayutsu, senchi achitsü aser ita asem tashi license sota ayutsu. Tanaben aibelenertem ita trok tashi tepuokdak ayutsu aser senchi achitsü, ta PRO, Kohima Police-i metetdaksuogo.

Iba sentong nung mendenji Deputy Superintendent of Police (Traffic), Kohima liasü aser PUBC, Kohima Associate Pastor-i machine aser motorcycle tem meshiteta sarasadem.

NBCC-i BJP dang tenla ki merukmejutsu mesudaksutsu metetdaksur

Dimapur, April 30, 2024 (TYO): Bharatiya Janata Party (BJP) Nagaland Unit-i May 11 nu tenla ki temekettem meruktettsu osang sangoktsuba sülen Nagaland Baptist Church Council (NBCC)-i BJP dang iba mapa magizükba metetdaksuogo.

NBCC-isa BJP Nagaland dang linuk nung tangalen tenla kitem kumzuka ayutsu atema party zungsemtem ajungmesotsu metetdaksuogo.

"Nenoki arogo asoshi mapa tajung inyaktu ashiba onoki magizüker, aser iba den külemi nenok dang tanga mapa ka inyaktu shidanger" ta NBCC-i ashi.

BJP Nagaland-i party zungsemtem dang Nagaland state kubok mandal 60 nung mapa kar inyaktu tetuyuba agutsüba nung "church compound" meruktettsu shia lir aser iba atema NBCC-i telangzuba agutsu.

"BJP yimsusuba kubok linuk nung reshikangshi tia balala ajurua arur. Tawa tamangba yimsu aser lokti nung nubo agi tangar memenepertemi timtem jenti ajurua arur. Khristantem tekülem magidaksur, pastor aser putirtem zuka merenshir, reshikangshir aser tepuokdak

ayur aser iba ajanga linuk nung nisungtem sadema meliteter. Onok Khristan maitsütem nunga kongshir aser ozu temeshi tekülem kitem raksatsur. Onok adenshiba nung tenuk yoker aser iba ajanga linuk nung tamangba yimsu rejutem lendongbang nung lir" ta NBCC-isa metetdaksu.

Nagaland state BJP lennirtemi India kubok tangalen reshikangshi tia ajurudaki party zungsemtem yoktsula. Iba inyakyim ajanga teti amakba tenla ki aser rejutem nung nubortem temulung ulutsu, ta parnoki ashi.

"BJP office-i mapa tajung inyaktu ashiba atema tenungsang agutsur saka onoki timi iba mapa magizüker. Tang atemabo onok sasa dang tenla ki anepaludi. Tenla ki merukmejua ayutsu onok dang nenshiba atema nenok nem tenungsang agutsur. Iba ya yimten o masu saka arogoi yimten den tepila aliba latetshirba dang lir" ta NBCC-i ashi.

NBCC-isa political party tem dang kanga dang kumdanga pei party zungsem nem tetuyuba agutsutsu shiogo. "Kechi ashitsü aser inyaktu meteter ang, aser nubori agizuktsu ta angateta

jembishinua aser inyaksangshiba ajanga asen state nung tebendang aliba angajemteptsu. Political party ka ama liang aser arogo nem pei pei compound nung kechi koda inyaktu'ar inyakdakjang" ta NBCC-isa metetdaksuogo.

BJP Nagaland-isa June 23 nu Syama Prasad Mukherjee asuba anogo bilemteta amongtsu ashiba atema NBCC-i olen ka shiogo.

"Arogoi Kibur Yisu Khrista asoba, asuba aser shia aruba anogomong amongba dak alaka tangar asuba anogo bilemteta amongba yimya subaa mali. Iba ya inyakra, nisungba indang tesayuba aser tangatetba sülen anidaker asutsu. Anungji political party kati Khristantem teimba ser aliba state ka nung iba ama tetuyuba agutsutsu makok" ta NBCC-i ashi.

"Political party temi pei sensotem dang iba ya mongnang mesura inyakang ta tetuyuba magutsutsula kechiyong political agenda nung ibala onuktem dena mali" ta parnokisa ashi.

NBCC-isa arogo tem dang political party ka tamangba yimsu tsutsu inyaksangshidang kumdanga alitsü kechiyong arogo aser yimsusuba tsungda tashi balala lir ta metetdaksuogo.

A. Z. Phizo sur kum 34 ajungba bilemteta tushiogo



Kohima, April 30, 2024 (TYO): Naga linuk tebu A. Z. Phizo sur kum 34 ajungba bilemteta April 30, 2024 nu sentong ka agiogo.

Iba sentong ya Naga National Council & Federal Government of Nagaland kubok Phizo Graveyard Committee (PGC) ajanga ayongzük.

Iba sentong nung nisung aikati aser NNC/FGN units balalai leper nung naru yuja tetushi aguja liasü.

"Phizo ya Naga nunger lennir chichiba ta teti bilemtettsu kechiyong pai Naga nunger asoshi takum bendanga agutsu" ta PGC convenor Apfhelie

Kesiezie-i ashi.

"Yangi pa indang ali masu sernung nisung ka rema lir saka nisung ajaki pa indang ali ta agizüker. Tangar lennirtem ama masu pa ket nung ali kimung kecha mali, pa nungtem nung ki yanglua mali, bank balance kecha mali, sen mali" ta Kesiezie-i ashi.

"Pai takum bendanga agutsuba nubortem mulungjang pa lir. Pa ket nung sen maliasu saka pai tangar takar kumdaksu. Pa indang ki maliasu saka par nubortem kidang lidaktsu. Pa ket nung gari maliasu saka Nagaland nung yimsung ajunga ama sema senzü" ta paisa ashi.

Pa tsukchirtemi meta talang pilaba lima kati pa yok saka bendangertemi pa pusema nungit. Pa suogo saka nisung ajak temulungjang nung pa lir, ta Kesiezie-isa metetdaksu.

"Zapu Phizo ji iba ama nisung ka liasü, tsukchirtemi pa sempa saka akhümtsübu. Naga nungeri pa chichiba lennir ka ta teti ashitsü" ta paisa shisem.

Iba sentong nung mendenji NNC spokesperson Kolezo Chase liasü, Angami Baptist Church Council Executive Director Rev Dr Rachülie Vihienuo-i Lai zunga sarasadem aser UBC Kohima o Lidi Kro-u Kohima village-i ken ajanga shilem agia liasü.

Friends of 80+ pur 19th Foundation Day amung



Kohima, Rongchii/April 30 (TYO): Kohima Village nung aliba Friends of 80 Plus nung züngsem 207 adenshia Marocchino Hall, Christ King Church nung April 30, 2024 nü 19th Foundation Day munga liasü.

Friends of 80+ ya Kohima village nung tangatetba tajung alirtemi lanurtem nem yimtsüng nung tetsü-tebou aser teintet rogotem aliba benjongtsü asoshi sapang agütsütsü mechi kumteta liasü.

Küm shia Friends of 80+ ajanga April 30 anogo ya foundation day ama munga arur, aser iba anogo yimtsür yimertem adenshia teintet rogotem den chiyongtepa sempet agüja amunger.

Iba sentong nung mejeta jaoker ama jembidang, asen otsüla aser oboula nunger nem tenüngsang agütsütsü kanga tongtipang lir, ta Northern Angami Public Organisation (NAPO) tir Kedu-o Zumu-i ashi.

Otsüla-oboula nunger moatsüba atema pai Tsüngrem nem tenüngsang agütsü aser parnok ya asen takum asoshi temoatsü tulu lir ta ashi.

Kohima village nung iba ama mapa tajung inyakba atema Zumu-i tenüngsang agütsü aser danga yimtsüng temia yamai inyaksü imlar ta ashi.

Kohima village nungya arishi küm 80 tema nisung 207 lir aser yangji tetsür 132 aser tebur 75 lir.

Iba anogo teintet rogotem asoshi special health care ayongzüka aser parnok tushia sempet agüja liasü.

State Programme Manager Social Inclusion & Social Development, NSRLM, Khriezovonuo-ia iba sentong nung teintet rogotem asoshi sorkari scheme balala tenzüka aliba indang lemsatepa liasü.

Teintet rogo nungi Lhoubei-ü Solo aser Rüsö Khrie nati iba sentong nung temeja ken ka aten.

Sentong nung Vilakuolie Mere menden liasü, Rev Fr. Innocent SDB, Principal Christ King Higher Secondary School ajanga teintet rogotem moaja sarasadem aser Kevitsu Yhome-i melepzüng o jembia liasü.

KÜM 105 AJEMMOKBA MUNG

Aba, Sakumar Longkumer, Chungtiayimsen

Tanü anogo May 1, 2024, Obala küm 105 nung ajemmokba, Teyanglur Tsüngrem nem tenüngsang agüja onoki sarasadema amunger.

Ano Tsüngremer akhüm nung maneni arishi talang moajangma ta onok teti dang sarasadem.

- Temeim Jala Jabaso & Semchirtem



Industries & Commerce Department nung Director den tepila sentong agi



Department of Industries & Commerce nung Director menden nungi anisüngzüksang A. Temjen Jamir den tepila sentong ka April 30, 2024 nü agia liasü.

Dimapur, Rongchii/April 30 (TYO): Department of Industries & Commerce nung Director menden nungi anisüngzüksang A. Temjen Jamir den tepila sentong ka April 30, 2024 nü Conference Hall, Directorate of Industries & Commerce, Kohima nung agia liasü.

A. Temjen Jamir ya sorkar mapa nung Extension Officer ka ama April 1989 nung ait aser March 1, 2023 nü Director mendeni atu. Pai Department nung küm 35 tenzüker April 30, 2024 nü anizüngzüker angur.

Director menden nungi anisüngzüksang A. Temjen Jamir-i iba sentong nung tepila o jembidang, pai takok anguba atema Tsüngrem nem tenüngsang agütsü aser staff temi yaritepba asoshi pelaba lemsatepa liasü.

Pai telok dang temelenshi

agizüksü aser team ka ama mapa inyaka maneni angazüksü ayongzüka liasü.

Advisor, Industries & Commerce, Hekani Jakhalu-ia iba sentong nung jembidang A. Temjen Jamir ya tongmelang, sasapelar aser nübortem asoshi inyaksü temulungtetba tulu aliba nisung ka lir, ta ashi.

Pa lenisüba kübok department metetsümonga ainba nguogo, aser pa dak nungi tangazüksü jenti lir, ta Commissioner & Secretary, Industries & Commerce, Kekhrievor Kevichusa-ia ashi.

Iba sentong nung officers aser staff tem tenüng nung Director tassenba, P. Tokugha Achumi-i jembia aser establishment branch ajanga temeja ken ka tena liasü.

Iba sentong nung Additional Director Er. Y. Lipongse Thongtsar menden liasü.

Fazl Ali College nung Dr. Imcharenla den tepila sentong agi



Dimapur, Rongchii/April 30 (TYO): Fazl Ali College, Mokokchung nung mapa nungi anisüngzüker angur Dr. Imcharenla, Head of Department, Department of Economics den tepila sentong ka April 30, 2024 nü agia liasü.

Iba sentong nung tesayurtem tenüng nung Dr. I. Wati Imchen, Principal, Fazl Ali College ajanga jembidang, temang anema lia iba alizüng tongtetba atema la den tepela lemsatep aser college asoshi lai mapa tajung balala inyakba atema pelaba shisem.

Paisa Dr. Imcharenla dang mapa nungi anisüngzüka jangratema alitsü moaja liasü.

Dr. Imliwati-i FACTA tenüng nung jembidang, lai committee balala nung züngsem ama Fazl Ali College nung shilem balala agiba lemsatepa liasü.

Department of Economics tenüng nung Dr. L. Imlichet Imchen-i jembidang, Dr. Imcharenla dak ajemalu aser temeim aliba tushia liasü aser la mapa nungi anisüngzüka ajanga department nung longzüker tajung ka samar, ta

ashi.

Iba sentong nung FACSU tenüng nung Asensor aser Imsunaro T. Ao ajanga jembia liasü.

Dr. Imcharenla-i küm 31 sür ita ka Fazl Ali College nung inyakba bilemteta jembia aser college dang pelaba lemsatep.

Lai külem tesayur aser kaketshirtem dang iba kaketreju aintsü asoshi tajungtiba agütsütsü ajungshia liasü. Dr. Imcharenla ya tesayur mapa küm 34 ser ita 9 inyaker mapa nungi anizüngzüker angur.

NAGALAND POLLUTION CONTROL BOARD						
Signal Point, Dimapur - 797112, Nagaland Tel.: 03862-245727, TeleFax: 03862-245728 Website: www.npcb.nagaland.gov.in e-mail: npqb3@yahoo.com						
AMBIENT AIR QUALITY FOR KOHIMA AND DIMAPUR CITY KOHIMA ASER DIMAPUR NUNG MOPUNG MERÜK-MEMERÜKBA JENJANG						
Sl. no	City	Location of air station	Type of area	Monitoring dates		Permissible limit As per the National Ambient Air Quality Standards "Iba tasazük alemabo metudaktsütsüla"
				23.04.2024	25.04.2024	
1	Dimapur	Bank Colony	Residential	146	92	100 µg/m ³
2		Dhobinala	Commercial	206	175	
3		NPCB Office, Signal Colony	Residential	110	114	
4		Tenyiphe, Chumoukedima	Commercial	68	56	
5		Nagarjan	Residential	120	90	
6		Viola colony	Residential	86	60	
7		Burma camp	Commercial	177	132	
8	Kohima	Opposite NST Office	Residential	99	69	
9		PWD Junction	Commercial	101	96	
10		High School Junction	Commercial	179	176	
11		Midland (Upper)	Residential	92	82	
12		Forest Colony	Residential	103	117	

Iba osang ya nübortem ajangzüksü atema Nagaland Pollution Control Board-i agütsür.

Power Department nung Chief Engineer ana den tepila sentong agi

Dimapur, Rongchii/April 30 (TYO): Chief Engineer (Transmission & Generation), Er. Penrithung Yanthan aser Chief Engineer (Distribution & Revenue), Er. Tiameren Walling na nem akum agüja tepila sentong ka Conference Hall, Directorate of Power, Kohima nung April 30, 2024 nü agia liasü.

Iba sentong nung Minister, Power and Parliamentary Affairs, K.G. Kenye-i Power Minister ka ama ajangshibatem indang lemsatep aser Chief Engineers ana den mapa jangratema inyakogo, ta ashi. Tenati len aniba aser shisatsü jenti aliba ajanga ni teyari tulu nguogo ta pai ashi.

Iba sentong nung Chief Engineer, (Distribution & Revenue) menden nungi anisüngzüksang Tiameren Walling-i jembidang Power Department indang officers aser staff temi anibelem mesasai department tejak

tentettsüsa inyakba atema pelaba lemsatepa liasü.

Department nung ketdangsür temi teti yaritepba ajanga office nung mapa junga inyaktet, ta pai ashi.

Chief Engineer (Transmission & Generation) nungi anisüngzüksang Er. Penrithung Yanthan-i Department nung küm 35

inyakba aser iba mapang tetsükdaktsü, timtem aser lendong ajuruba indang lemsatepa liasü.

Item tetsükdaktsü ajanga pa takum tajungba yanglushia liasü ta ashi aser sentong nung adenertem dang kati ka den yariteptsü ayongzüka liasü.

Iba sentong nung Superintending Engineer (Transmission), Er. Nitovi A. Wotsa menden aser Additional Chief Engineer, (Distribution & Revenue) Er. Wabangmeren Jamir ajanga melepzüng o jembia liasü.

Devender Yadav Delhi Congress tekolakba kümogo



Congress lenir Devender Yadav, tawa adenba party tasenba lenirtem aser taoba Punjab police ADGP Guinder Singh Dhillon nunger den AICC office, New Delhi nung tangokba noksa nung angur.

New Delhi, Rongchii/April 30 (Agencies): Congress-i Mongolbarnü party indang Punjab unit tekolakba Devender Yadav, Delhi Pradesh Congress Committee interim tir asütsü shimogo.

Osang ajangsa Yadav-i, Punjab All India Congress Committee (AICC) incharge mapa maneni abentsü.

Taoba Delhi Congress tekolakba Arvinder Singh Lovely-i mapa toktsüba sülen anogo ana lir iba jenjang ya agiogo. Lok Sabha elections atema Aam Aadmi Party (AAP) den longjemer toktepba dak sendakba nung Arvinder-i mapa tokja liasü.

Congress-i sangdong ka ajanga, "Congress tir-i Delhi

Pradesh Congress Committee interim tir mapa abentsü atema Devender Yadav shimogo. Pai maneni Punjab atema AICC In-charge mapa abentsü," ta metetdaksü.

State nung 2024 Lok Sabha elections atema Congress party-i candidate shimba dak sendakba nung temulung masüba Lovely-i lemsatepogo.

Pai ashiba agi, "PCC's (Pradesh Congress Committee) meraket mesamadaksütsüla. Candidate ka officially mesangdong tsüngda PCC nem metetdaksütsüla saka parnoki aji minyak."

"Ni yamaibo PCC tir ama minyaktetsü, saka melara Congress worker ka ama inyaksü ni renema lir. Parnoki

ni maginiura ajibo ken o balaka," ta Lovely-i ashi.

Pa indang resignation shiti nung Lovley-i, AAP den par party longjemba aija liasü.

Pai, North East Delhi aser North West Delhi constituency nungi Kanhaiya Kumar aser Udit Raj na nominate asüba aija liasü. Delhi Congress-i iba anema nokdakaka party lenrtemi parnoki ashiba mangai iba jenjang agi, ta pai ashi.

Indian National Developmental Inclusive Alliance (INDIA) kübok Congress party pur Delhi nung Lok Sabha menden tenet nungi asem nung tokteptsü aser AAP menden pezü nung tokteptsü. Ajisüaka Punjab nungbo party anaprongla balala tokteptsü.

Admiral Dinesh K Tripathi Chief of Naval Staff kümogo



26buba Navy chief mapa magizük tsüngda guard of honour ka agütsüba mapang Admiral Dinesh Kumar Tripathi-i tetsü dang nungi temoatsü meshiba noksa nung angur.

New Delhi, Rongchii/April 30 (Agencies): Admiral Dinesh K Tripathi Mongolbarnü 26buba India indang chief of naval staff kümogo. Pai Admiral R Hari Kumar melenogo, shibai iba mapang küm anaser ita pongu bona liasü.

Chief of naval staff maküm tsüngda Admiral Dinesh K Tripathi ya vice chief of naval staff liasü. Pa 1985 küm July 1 nü navy nung aden.

Mapa agizükba sülen Tripathi-i, "kümtem tsüngda navy kanga renloka oa raratsü atema renema aliba force ka kümogo. Tzüyim nung

tetsükdaksü aika ajangshia aoba mapang tetsükdaksütem kottetsü atema India Navy teti renema alitsü nungdaker aser iba dak rangloker ni inyaksü," ta pai ashi.

Paisa, Atmanirbharta ajangtettsü inyaka aliba tashi itshidaksütsü aser technology tasen bendenloksü atema dena rangloker inyaksü, ta ashi.

Tzüyim nung China-i tashi amshitsü merangba, temzüng ozüng dak ajemdaker international inyakyim kümzüka ayutsü atema aser Red Sea nung mangatetep adoker aliba mapang Arabian Sea kanga tongtibang akümbe aser tzüyim

nung rakzürakdemertem poktetshiba mapang ka nung Tripathi-i iba mapa agizükogo.

Mapa tasen agizükba sülen Tripathi lenisüba nung indigenization dak rangloker navy modernization atema jenjang agitsü. 2047 küm India nüjiso ngur küm 100 ajungba mapang tashi nungbo tangar dak memetaloki alitsü atema India navy rangloker inyakdar.

Maneni linük nung military lenirtem melenshitsü lir, kechiyong army chief General Manoj Pande May 31 nü mapa nungi anentsü. Pande mapa nungi anenba sülen Army vice chief Lieutenant General Upendra Dwivedi-i pa melenzüksü imlar.

2024 küm January ita navy indang vice chief maküm tsüngda Tripathi ya Western Naval command chief liasü aser pa taoba mapang navy indang chief of personnel ama inyakogo.

Communication aser electronic warfare specialist ka ama pa frontline warships nung signal communication officer aser electronic warfare officer ama inyakogo aser iba sülen guided missile destroyer INS Mumbai nung executive officer aser principal warfare officer ama inyakogo.

Chhattisgarh nung Maoists züngsem 7 tepset

New Delhi, Rongchii/April 30 (Agencies): Chhattisgarh kübok Narayanpur district nung security force den khatepba sülen Maoists züngsem tenet tepsetogo. Kanker district nung security force den khatepba sülen tetsür ana densema Maoists züngsem tenet tasümgang ngutetogo.

Telok ana tsüngda Narayanpur-Kanker arrtsü nung Abujmad arem nung khatepa liasü, kong Directorate General of Reserve Police (DRG) aser Special Task Force (STF) personnel tem Mongolbar anepdang Maoist tem asütsü ta temulung melemi bilemba telok ka den khatepa liasü.

Inspector General of Police, Bastar range Sunderaj P-i ashiba agi, Abhujmad arem nung Tekmeta aser Kaakur yimtsüng na tsüngda telok ana tsüngda khatepa liasü.

"Maoists lenir tejentem arem nung jenoka aliba indang osang

tejangja ka angazükba sülen District Reserve Guard (DRG) aser Special Task Force (STF) na longjemer Hombar aonung iba arem meita oa liasü. Parnok Kankur yimtsüng atongba sülen khatep tenzük. Karatep anenba sülen tetsür ana densema Maoist züngsem tenet tasümgang nguteta liasü," ta IG-i ashi.

IG-isa, khatepba tesem nung AK-47 rifle ka aser tanga prangbong injang aser bomb tem nguteta liasü, ta ashi.

"Onoki bushistüngdang ka tenzükogo aser Maoist tem maitsü tang tashi mejangjai lir," ta IG-isa shisem.

Iba tatalokba sülen taküm state kübok Bastar tesem nung security forces den khatepba mapang Naxalites 88 tepsetogo.

Security force aser Maoists tem khatepa Maoist züngsem 29 khasetba sülen anogo ishika lir tang iba ya atalokogo. Parnok rongnung Maoist lenir Shankar Rao aser Lalita Meravi nata densema liasü.



INDIA alliance candidate Varsha Gaikwad, Mumbai nung Lok Sabha election atema nomination file masü tsüngda rally ka nung shilem agiba noksa nung angur.

'BJP-i sorkar kümtetra constitution shisar intoktsütsü': Gandhi

New Delhi, Rongchii/April 30 (Agencies): Congress MP Rahul Gandhi-i Mongolbarnü ashiba agi, Centre nung Bharatiya Janata Party (BJP)-i sorkar kümtetra parnoki Constitution shisar intoktsütsü.

Madhya Pradesh kübok Bhind nung nüboyimba sentong ka nung shilem agiba mapang Gandhi-i Constitution copy ka amer jembiba mapang, tang agia aliba Lok Sabha election ya akhi ama election ka masü saka ideologies ana tsüngda rara ka lir, ta ashi.

"Sensaker, ST, OBC tem nem Constitution ajanga temeden aika agütsür lir aser iba ajanga MGNREGA, ali temeden, reservation aser tanga maangka aika agütsür," ta Gandhi-i ashi. "BJP-i sorkar kümtetra parnoki Constitution shisar intoktsütsü," ta pai ashi.

Gandhi-isa, Ato Kilonser, Amit Shah (Union Home Minister) aser parnok MP temi parnok shimra iba kaket (Constitution) ya shisar intoktsütsü mulungtetogo. BJP-

i iba kaket ya intoker billionaire 20-25 nem linük inyakyim aziokdaksüner, ta ashi.

Wayanad MP-isa, reservation ken o dak sendakba nung BJP aija liasü.

"Nenok reservation anema nokdaker masü süra, kechiba PSUs, Railways aser tanga sector tem privatize sütsür? Nenoki kechiba Agniveer scheme benok? Kechiba contracting inyakyim ajungketer? Item inyakyim ajak ya reservation anema lir," ta pai ashi.

Maneni Gandhi-i, Congress-i sorkar kümtetra, Mahalaksmi Yojana ajanga tetsür crore aika "lakhpati" kümdaksütsü, ta ashi.

Iba scheme kübok sorkari, tetsürtem "lakhpati" kümdaksütsü atema parnok indang account-i sen lakh 1 (itashia 8,500) yoktsü, ta pai ashi.

"Ato Kilonser Narendra Modi-i industrialists 22-25 billionaire kümdaksütetra, Congress-i tetsür crore aika lakhpati kümdaksütsü," ta Gandhi-i ashi.



TIR YIMYIM

YIMOBILEM (EDITORIAL)

DIMAPUR RASEMNÜ, MAY (MONUPII) 01, 2024

Ano election ka

- P Tiamongba Aier

Tawa Nagaland nung Lok Sabha election agili ano June ita Urban Local Bodies (ULBs) elections agitsüba indang osang sangdongogo. Nagaland nung küm 20 tashi ULBs election magiteti aruba sülen taküm agitsü sentong renemogo aser joko state sorkar o sendaktepa alirtem tsüngda tangatetep kati aruadokerji takumbo sentong renema aliba amaji June 26 nü agitsü imlar. Urban Local Bodies (ULBs) ya kanga dang tongtipang reju ka lir aser tanü India nung state sorkar sülenbo ketdangsüba tashi tulu abenba reju ka kümogo. 1990s matongdang India nung ULBs ya state sorkar kübok dang liasü aser inyaksangshi, senotsü aser ketdangsübaren nung talenba aika liasü. Ajisüaka 1992 küm 74th Constitutional Amendment Act (74th CAA) ajanga ULBs ya pei sasa ketdangsüba rejutem kümdaktsü aser Act nung onük aika bendenlokba ajanga inyaksangshia aotsü lenmang aika lapoktsüba den tashi agütsüogo. Anungji ULBs election ya kanga tongtipang election ka lir aser Nagaland nung Municipal Council 3 den Town Council 36 nung councillor mendenjia kangasa tongtipang lir. Süra Mokokchung district toktsür tanünga district tem nung Aor councillor karbo adoktsü madoktsü ta asenoki shisadangtsü nüngdaker kechiyong Aor aika Mokokchung toktsür jila balala nung soyapokya lidar. Hao, Nagaland nung tanü kin-kidong mesüra tesem dak merangloki Naga nunger ka küma longjemtsüba indang jembir saka asenok kin balala ta ser ali tashibo külem onük kar dak alaka, pei pei kin ayak nung ajemdaker maparen inyaksangshia aotsüsa akümstü aser jembitsü. Süra, taküm ULBs election nung asen Aor candidate kwi ka tokteptsü renema lir aser jila balala nung aliba Aortemia pei nübo yaritsü terenemshiba lir asü mali. Tangalenji asenoki meranglokli saka Kohima aser Dimapur nung Aor nübo tajung karbo councillor menden nungji amentsüsa asenok renema lir mali, yaritsü mulungteta lir mali asü party wise tangatetba nung tangar ang ka yaritsü tebilemba lir. Tawa Lok Sabha election nung Aor candidate ka aliba atema Aor sabang aika nung pei nisung, pei kin yaritsüla ta jembia aru saka nisung aikati party dak mesüra MLA dak rangloker tangar nem ang vote ajenba osangtem angashir. Hao democracy lima ka nung alirji election nung nai-ni shiba yarinüdir yaritsü, shingaia tetuyuba agütsütsü makok ta jembir aser ibaji shitak, saka ano khen aroka shisadagra Naga lima nung Aor ayak aser maitsü atema-a asenoki bilemstü nüngdaker aser ibaji talisa pei tasoli Mokokchung adena orr alirtemi shisadangtsüla. Yimtsüng aika pei tasoyim nung aliba kilen yongsük dang nungibo jila balala nung ang kilen teimba ser alir aser alimaji yamai dang aotsü anungji na aser ni aliba jila nung Aor ka songteta yaritsü asoshi menungnangtsüla. Joko ita ka ser tesadang ka sülen ULBs elections agitsü anungji tang nung asen tangatetba melenshir na-ni nija atema masü saka Aor ayak aser maitsü atema tuluba bilema aser talisa Naga lima nung Aor jenjang ajungkettsü atema tangatetba nung shilem agitsü aser yaritsü bilema ata nung jungdisü.

OLEMSABANG

Tanü Aor tamang kechi jenjang nung lir ?

~ L.Kika Pongener.

Tang agiba Lok Sabha Election nung-to Naga nunger ajunga dang nungi tamasa Khristan yimsu agizükba kin Aotsür Aor-i koda shilem agi...??? Sen tashi (Money Power), alima tashi (Worldly Power), mesura VIP kar jenjang (Position) jungdaktsütsüba...Iba nungji rangloker shilem agi asü...??? Iba tasüngdangbaji khen asüngdangdi. Aji oda, küm-150 sua amanga arur tamangertemi Khristan tamangba yimsu anema inyakba Party den sendaktepa aliba nem asen temeden aser senti Vote agütsü asü...??? Küm-150 sua amanga arur Aor tamangertem...Tanü India lima nung jakdak-jakdaka Khristan yimsu anema aser Khristan-tem anema inyakba asen tenuk agi angur aser angashir, anungji metetsümonga item mapa denjibo sungra külemi maputepnutsüka sernung...!!! ta bilemer. Aji oda, iba ama tensa ka nung yimsusurtema shirnok asen tamangba wazüka ayutsü melen, pei jenjang ajungtsü aser pei menden tajung nung amentsüba-jiang tongtipangba sudaktsür, item yimsusur-jibo nuburtemi akümstüba aser meraketa merepranger. Tsüngrem oi ashir..."Mamangertem den mesutepi sungra külemi taputep; Kechiyong temenen den temeshiba kechi nung puteptet ? Aser amang den tesangwa kechi nung puteptet ? Aser mojing den Khrista kechi telongjem ali ? Mesura mamanger den tamanger kechi shilem aka ? Sungyanglu den Tsüngrem tenlaki kechi nung puteptet ?.....Anungji parnok rongnungi adoka balala liang ta Kibubai ashir" (2 Korint-6:14-17).

Aotsür Aor Tsüngrem lartem, putu yimsusurtem, arogo nung tenzükertem aser arogopurtem...Aseni amangba Yisu yimsu wazüka ayutsüba dang nungibo asen madak yimsusurtem jenjang (Position) jungdaktsütsüba-ang tongtipangba (Priority) sudaktsü asü...??? Aji oda, tang Lok Sabha Election agiba-to Aotsür Aor tamang tendangba mapang ka liasüa ta bilemer. Tang Election nung, Election nubuyimba lokti senden nung, yimsusurtemi Khristan yimsu aser ayak mesamadaktsüi wazüka ayutsü jembiba asenok ajaki angashiogo. Surabang, Mon District nung Tapi Constituency nung Bye Election agidang-to, Deobar anogo nung Vote azüngtsü Election Commission-i anogo latetba nung-to, asen sorkar yimsusurtemi kechiba ola kata madok...???...ta nuburtem kanga sungmangogo...!!! Küsa Bye Election nung Mizoram sorkar-ibo Deobar anogo nungbo vote mazüngtsü ta ola adok, yongji par State nungbo anogo melenshi. Ajisuaka, asen State nungbo latetba ama Deobar anogo nung Vote züngogo. Aji oda, Center sorkar-i ashiba tashi mangara sen 'Fund' tangutsü tim shitak mangutsü tsüboba agi ola madok asü...??? ta nuburtemi bilemogo. Naga nunger yimsusur atemabo Yisu dak amangba dang nungibo sen angutsüba-jiang tongtipangba asü...!!!??? Anungji yimsusurtemi tang Election nung Vote aginuba agi jembir ashi, Election temer külenbo, Khristan yimsu anema jakdak-jakdaka tapu-tapu inyakyongjia ola madoki tashi anga-a anidaktsüa ta iba mapa yagi küli tejangja nuburtemi angur.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Bishop Mar Mari Emmanuel-i Tsüngrem mapa inyak tenzükogo



Wakeley, Australia nung aliba Christ The Good Shepherd Church indang bishop Mar Mari Emmanuel-i April 29, 2024 nü Tsüngrem o jembidang tangokba noksa ka yangi angur.

Sydney, Rongchii/April 30 (Agencies): Ita tetenzüklen Wakeley, Australia nung Tsüngrem o jembiba mapang kotari agi atsüngsang Assyrian bishop-i pa tenük külen raksaogo ta ashi.

April 15 nü Bishop Mar Mari Emmanuel dak kotari agi atsüngba sülen pai Deobar nikongdang Wakeley nung aliba Assyrian Christ the Good Shepherd church nung o jembia liasü.

Pai Arabic aser English oshi nung Tsüngrem o jembidang pa tenük achichilen nembanga eyepatch inoker liasü.

Pai Arabic oshi nung sayutsüngiba mapang pa tenük ya bendanga agütsüba ama züngshitsü ta ashi. Ibai Muslim nung dang temeim sayuba ama agizüksüla, ta pai ashi.

Pa dak kotari agi atsüngsang nem pai tatok agütsür ta ashi.

"Ni na asoshi sarasademtsütsü; ni teti na asoshi tajungtiba moatsütsü," ta

Emmanuel-i ashi.

Arishi küm 53 tain Emmanuel ya tekülem sentong ka nung Tsüngrem o jembiba mapang kotari agi atsüng aser mozü kidang anogo ishika munga liasü.

Australia sorkari aser social media site X (taoba mapang Twitter ta ajaba) tsüngta ken o kar adoka atsütepba nung 'freedom of speech' tsütsü pai bilemba lemsatapa liasü.

Iba sapang nungi bishop dak kotari agi atsüngba video indoktsü Australia sorkari totuyuba agütsü aser anogoshia senchi sen \$500,000 chia liasü, koba X aser kibur Elon Musk-i jembitsü ta ashir.

"Temeim Australia sorkar aser temeim ato kilonser Albanese dang ya ashir... Nisung meimchir ajak freedom of speech aser freedom of religion lir," ta Emmanuel-i ashi.

"Buddhist nung par tamangba lemsateptsü temeden lir; Hindu nung par taangba

yimsü lemsateptsü temeden lir, Muslim nung par tamangba lemsateptsü temeden lir; atheists tema parnoki amangba lemsateptsü temeden lir. Khristanpura pei tamangba lemsateptsü temeden lir," ta pai ashi.

"Asenoki pei jeminütsü jembiba nung lendong lir ta ashir, democratic linük ka nung pei jeminütsü mejembitetter ta ashiba nibo magizükteter. Asenok tangatetba aliba meimchir ama, tashi temeteter ama asenoki aitsütsüla, saka asenoki metsübotsüla," ta ashi.

"Khristanpur masür kati küm tamangba yimsü aitsütsü akok, anema nokdaksü akok, saka Tsüngremi tatok agüjang aser Tsüngremi na moajang ta ni ashitsü," ta bishop-i ashi.

Emmanuel dak teka sangshir nem pai tatok agütsütsü mulunga aliba indang tang mezüng jembir masü. Iba lendong ya ataloker anogo ishika lir pai audio nung sangdong ka agütsüba nunga pa dak kotari agi atsüngsang asoshi sarasademtsütsü ayongzüka liasü.

"Kidak shibai iba mapa inyak, ni tatok agütsür. Aser ni pa dang 'Na kü jabaso. Ni na meimer aser ni teti na asoshi sarasademtsütsü' ta ashitsü. Iba mapa inyaksü asoshi shirnoki na yok, parnok nema Yisu tenüng nung tatok agütsür. Kü temulung nung ajak asoshi temeim dang lir," ta pai audio sangdong nung shia liasü.

Bishop dak atsüngba atema arishi küm 16 tain tebur ka pua kiralongra mapa inyak ta tai tonglokja lir. Aser iba mapa nung shilem agi südi ta temulung meleni ano tanur tenet pua lir.

ANO GO ABEN TSÜNGREM DEN

Tasüngdangba Takang

- T.Ken 119: 89 - 96.

Alima nung terenemba takang mayur ta nai meteter asü? Yimtenren terenemba aika renemer saka teinyaktetba tera dang alir. Terenemba inyaksü agütsür saka tebenja teimba adoker. Ano renemshitsü jembir. Kodanga takang terenemba malir. Mapaji yamaji aor süra tekong 89ji repringang: O Kibuba, teti tatem maka, Nü o kotak nung akanga noktaka lir."

Shinga o akanga malir. Kü tebilemba aser amangba ni melenshir. Kodang ni kü o shidak yudir aji tamangtsü lir. Saka Tsüngrem O bo teti akanga akanga lir. Pa O atangji aser tamangtsü lir. Tsüngremi tiyazü jembitsü makok, anungji Pai Pa O nung melenshitsu ta asenoki shisabulua malitsüla.

Tsüngremji teti tatem makai atangji lir. Bazar nung, dokan nung teti oset jenjang melenshir. Tsüngrem O bazaar oset amaji masü. Yisui ashi, "Anüng ali suitemtsü, saka kü o tem kecha südanga süitema maotsü" (Matt. 24: 35).

Tsüngrem o memelenshir. Tsüngremi o langtepa mejembir. Pai tongmelang agi ashir, "Lemangji ibai lir aser aji yamaji dang alitsü." Pai mapatemji koda bentetter nai metetnera, Pa O ji züngang.

Mapatem koda bentettsü Laishiba nung angur. Rara koda bentettsü Tsüngrem O nung ashir, tebilemstütem koda bentettsü aser temenen nungi koda kümdang alitsü, Tsüngremi ashir. Ajak rong nung tajungtibaji, kotaki koda aotsü Pai Pa O nung ashir. Iba nung ajak bentetter. Yisu Khrista asenok asoshi kangki nung asü, asenok kümzüksü tanaben shia aru aser tamang ajanga Pa dangi arur ajak Pai kümzüker.

Mesüngjemetetba taküm nung Tsüngrem O ji tashi aser tesangwa ama alir. Ibai atangji, teti tatem maka aser melenshitsu makok nung asenoki ibai amangtsü akok aser iba ochi O nung alitsü akok. Tsüngremi temenen, tasüba, tekümtet aser teti tatem maka taküm indang tasüngdangba ajak Pa O ajanga bentettsüogo. Nai iba tasüngdangba ne sasa bentettsü akok asü? Tsüngrem O ji züngang aser bushiang.

Southeast Nigeria nung Khristanpur trok tepset

Abuja, Rongchii/April 30 (Agencies): Fulani shiruru metsürtemi Nigeria southeast tsütsü Deobar aonung (April 28) yimtsüng ka amakba mapang tanur densema Khristanpur trok tepset, ta osang kar ajanga ashi.

Item nisungtem yagi Enugu state kübok Uzo-Uwani County nung Khristanpur timba aliba Ugwujoro Nimbo yimtsüng ya aonung 11:00 ako meta amak, ta yangji alir kati ashi. Iba lendong nung tamanger tenet yiru, ta Chijoke Okunna-i ashi.

"Iba lendong nung tamanger tenet yiru aser parnok dak nok agi lepa liasü," ta Okunna-i Christian Daily International-Morning Star News dang text message ka nung ashi.

Ano yangjisa alir Michael Obinna-ia iba lendong ya Fulani shiruru metsürtemi agütsüba lir ta ashi.

"Shiruru metsüremi iba yimtsüng ya amak aser yimdaklirtem pei kidang mejanga lia injang khaloktsü. Tila tanur ka densema

Khristanpur nisung trok asüba jangaogo," ta Obinna-i ashi.

Asürtem ya Okeh Simon, Ugwu Oruku, Okeh Chukwuebuka, Julius Ogbonna Odiegwu aser Gabriel Ugwor Ezea alitsü, ta yangji alir David Ekwueze aser Okunna nati ashi.

"Tanura tepset aser ibai Fulani shiruru metsürtem mapa ta onoki meteta lir," ta Ekwueze-ia Christian Daily International-Morning Star News dang text message ka nung ashi.

Enugu State Police Command indang odongtar Daniel Ndukwe-ia iba lendong atalokba ya metetdaksü.

"Iba tesem nung aliba police officers nungia osang arua lir aser iba azüdokshi bushisüngdangtsü aser azüoktsü atema sepaitem yoka lir," ta Ndukwe-i ashi.

January 17 & 19, 2023 anogotem Fulani shiruru metsürtem aser danga kiralongrar temi Enugu state kübok Isi-uzo County nung aliba Ikem nungi tamanger pezü pua bener ao.

Alima nung Khrista sülen anidaksü atema Nigeria ya tamajungtiba linük ka lir, kong October 1, 2022 nungi September 30, 2023 tsüngta Khristadak amakba yong nisung 4,118 tepset, ta Open Doors indang 2024 World Watch List report nung ashi. Nigeria nung ozüng agi temelaba makai Khristanpur pua bener aoba ama danga lima nung mali, küng kasa mapang nisung 3,300 pua bener ao.

Tekülem ki aser ano mozüki, school aser cemetery amala danga tesemtem raksatsüba nunga Nigeria ya alima nung jenjang tasembuba nung liasü, kong iba ama atalokba 750 liasü, ta osang ajanga ashi.

2024 World Watch List report nung Khristanpur alitsü asoshi tamajungtiba linük asadanga nung Nigeria ya jenjang trok buba nung liasü.

Kin kidong telemsa noklang aika aliba Muslim Fulani ya million aika lir aser parnok ya Nigeria aser Sahel nung alir aser parnok ajakibo tashiyim mapa meinyaker, saka kari

Islamist tesayuba kanga akanga amanger, ta United Kingdom indang All-Party Parliamentary Group for International Freedom or Belief (APPG) ajanga 2020 report ka nung shia liasü.

"Parnoki Boko Haram aser ISWAP den mesüktepa tasa yanglur aser parnoki Khristanpur aser Khristanpur ayak nung tenük yoktsü tejangja sayur," ta APPG report ajanga ashi.

Tashiyim amshia Khristanpur li rakzüksü nükjidong nung shiruru metsürtem yagi Nigeria indang Middle Belt nung tamanger dak amaker, ta Nigeria nung aliba Khristan lenirtemi ashir.

Ano taoba hopta Nigeria north tsütsü Kaduna state nung aliba arogo ka nung sayutsüngitsü atema Khristan pastor ka aodang tepset ta ashir.

Kaduna state nungya Fulani shiruru metsürtem aser danga kiralongrartem kanga yakyaka lir aser "bandits" temi Birnin Gwari-Kaduna Highway nung meita atar Rev.

Manasseh Ibrahim ya Mongulbarnü khaset, ta Birnin Gwari chapter of the Christian Association of Nigeria (CAN) ajanga ashi.

"Rev. Manasseh Ibrahim ya ECWA (Evangelical Church Winning All) Church, Gure nung pastor ka liasü aser pa ya Kaduna state kübok Birnin Gwari Local Government Area nung aliba Kurebe area nung pastoral church ministration atema aoba mapang bandits temi atsüka atar tepset," ta local CAN chairman, Rev. Yahaya Kinge-i sangdong ka nung ashi.

Pastor Ibrahim ya ECWA Kaduna Central District Church Council (KCDCC) kübok ECWA Gure arogo nung inyaka liasü aser pa tasü mang ya Kaduna city nung aliba Barau Dikko Teaching Hospital-i bener ao, ta pai ashi.

"Kaduna state nung bandit aser telungpur telok balalai Khristanpur nem timtem balala agütsüba Nigeria sorkari menokdangtetba atema tamangertem tezüdanga kumogo," ta Kinge-i ashi.

AO OSHI ANGAZÜKDAK:
TANÜ ANGAZÜKTSÜBA OJANG



Süngkong

(n) ola adokdakja atemtsü atema süng tulu chipoka yangluba oset (log drum)

* Süngkong ola agi osang tapu balala metetdaksür.

Süngkotenem

(n) süng tulu tapu balala aliba tenem (hill full of huge trees)

* Süngkotenem wazüka ayutsüba ya kanga tongtibang lir.

OLONG PAITEP # 6773

1			2			3			4	
			5		6		7			
8										
			9							
	10									
									11	12
			13				14			
15						16				

TIPIEN

- 1. Anenzükdak ki - (5)
- 3. Asür mangyimba - (5)
- 5. Temulung nung shisadang - (5)
- 8. T ___ lu - (3)
- 10. Takdang temalen - (9)
- 11. Tesa ___ a - (3)
- 13. Ajungbena temulungjang tongtonglatsü atu - (5)
- 15. Tejen lai nung tesayur - (5)
- 16. Tsüngsak-mopung - (5)

LANGTSÜNGLEN

- 1. Reprangdaksü - (4)
- 2. ___ ur - (3)
- 4. Kiojen yangludak - (6)
- 6. ___ ait - (7)
- 7. Nagaland nung ayong ka - (5)
- 9. Küm kasa purtem - (5)
- 10. Tetsüng tajemetdak - (6)
- 12. ___ adenshi - (4)
- 14. Tsünüsenbongsü adokdak - (3)

OLONG PAITEP # 6772 TELANGZÜBA

TIPIEN :

- 1. Kasa, 6. Rangben, 7. Mait,
- 9. Poktet, 11. Ati, 13. Atasa, 16. Rür,
- 17. Rajang, 20. Lanu, 24. Nüngjem,
- 25. Süra.

LANGTSÜNGLEN :

- 1. Khu, 2. Süjak, 3. Onük, 4. Oba,
- 5. Anü, 6. Ratet, 7. Mozü, 8. Ita,
- 10. Tar, 12. Tinu, 14. Salem,
- 15. Aja, 18. Anünü, 19. Taju, 21. Ano,
- 22. Onü, 23. Kua.

NAI-A YA METETTER MA

LONDON MARATHON OTSÜ TASEN



2025 TCS London Marathon atema applications aruba ajanga alima otsü tase ka yanglutetogo. Sangküm London Marathon atema nisung 840,000 temai tenüng agütsüogo ta tayongertemi ashir.

2025 London Marathon atema UK applications 672,631 aruogo aser iba denji international ballot nung non-UK residents 167,687- i tenüng agüja lir ta TCS London Marathon atema event director Hugh Brasher-i metetdaksüogo.

Taküm sentong nung nisung 53,000 temai tatem tonga asema liasü aser iba ajanga Guinness World Records 44 tashi ajatetogo aser charity balala atema £67 million (US\$83 million) bendenogo.

Outer Manipur nung re-poll nung 81.16% liasü

Guwahati, April 30, 2024

(Agencies): Manipur nung Outer Manipur Parliamentary Constituency kübok Polling Station 6 nung re-poll asüandang vote enoktsür 81.16% ajanga shilem agiogo.

Outer Manipur Parliamentary Constituency ya scheduled tribes atema lemsütsüba menden ka lir aser Mongulbarneep 7:00 ako nungi nikongdang 4:00 ako tashi security akangakanga re-poll agia liasü.

Ukhrul aser Senapati district tem nung aliba polling station 6 nung voter aikati shilem agiogo. April 26 nü polling asüandang item polling station nung booth makdokba aser ozüng alema inyaksangshiba tatalokbatem ajurua liasü.

Outer Manipur Lok Sabha menden nung assembly constituency 28 dena lir aser April 19 nü mezüngbuba shilem nung constituency 15 aser April 26 nü tanüngba constituency tem nung agia liasü.

Outer Manipur parliamentary constituency nung vote enoktsür 10, 36,736 lir. Parnok ya tebur 5, 06,147, tetsür 5, 30,556 aser transgender voters 33 lir.

April 26 nü polling asüandang vote enoktsür lakh 4.84 nungi 76.06% shi kati shilem agia liasü. Iba ya assembly constituency 28 nungi 13 nung liasü.

April 26 nü polling asüandang electronic voting machines (EVMs) aser Voter Verifiable Paper Audit Trail (VVPAT) systems nung teka aiba osangtem nung ajemdaker Election Commission of India (ECI)-i Outer Manipur Lok Sabha constituency kübok polling station 6 nung re-poll asütsü tetuyuba agüja liasü.

Polling anogo nung vote agütsüba mapa metenzükdang polling station kar nung EVMs aser VVPATs raksatsü. Ano station ka nung EVM mapa meinyak aser ka nung mejangjangtetba nisungtemi timtem agütsüpet agüja liasü. Iba jagi election ketdangsürtemi polling station 6 nung voting records null & void kümtsü aser re-poll asütsü lemtet.

Ukhrul district kübok polling station 4 aser Senapati district kübok 2 nung tanü re-poll süogo.

MENUNGRA BILEMTETER



Late. Tiayangla Pongen
1st Mat 2023.

Alao! iba anogo nung nai Kotaker lima asoshi iba akümüli lima toktsür küm ka abensaogo, aji oda süka mapang shia aser tangola sashiba shia na adenba onok den dena ali ama meteter aser bilemteta menungraseta iba anogo amonger.

~ *Nai meima aliba, Kinungbo, Jabaso, Daughter-in-law aser Tenten.*



पेंशन निधि विनियामक और विकास प्राधिकरण
PENSION FUND REGULATORY AND DEVELOPMENT AUTHORITY

METETDAKTSÜR

Pension Fund Regulatory and Development Authority (PFRDA) office indang address melenshiba metetdaksür

PFRDA ya 01.04.2024 nü office premises tasenbai belenogo. Office tasenba address tsünglanglen agütsür:

Pension Fund Regulatory and Development Authority
E-500, Tower E, 5th Floor,
World Trade Centre,
Nauroji Nagar,
New Delhi-110 029
Phone No. 011-40717900

Ketdangsürtem den iba address tasenba nung tongteprateptsü akok.

Iba osang ya NPS architecture nung stakeholders ajak aser nürburtem asoshi lir.

Sd/-
CHIEF GENERAL MANAGER
ADMIN & HR Department

Please visit our website
www.pfrda.org.in for complete information or scan the QR code



TENÜNGSANG AGÜTSÜR



ICFAI University, Nagaland nungi imtiluen aser Limainla na jabaso **Temjenwapang I Longkumer-i** Bachelors of Computer Applications (2019-2022 batch) nung Gold Medal ngutetba atema Asangma Students Union-i tenüngsang aser tetushi agütsür.

Nü tarutsü wadang nunga maneni takokba lidakjang ta Union-i moatsür.

Moalong Lemtur
President, AST

Watisangla Longkumer
GS, AST

PUBLIC NOTICE



Branch Office: ICICI Bank Ltd., Office Number 201-B, 2nd Floor, Road No 1 Plot No-B3, WIFI IT Park, Wagle Industrial Estate, Thane, Maharashtra- 400604

Tsünglanglen shia aliba sen apuri Bank nungi sen apuba sentong aser tetemlok memenoktet aser iba loan ya Non-Performing Assets (NPA) kümogo. Securitisation and Re-construction of Financial Assets and Enforcement of Security Interest Act-2002 indang Section 13 (2) kübok parnok indang addresses dangi osang yokogo, saka parnok nungi telangzüba kecha malinung yimjak nung iba osang ya metetdaksür.

Sr. No.	Name of the Borrower/ Co-Borrower/ Guarantor/ (Loan Account Number) & Address	Property Address of Secured Asset/ Asset to be Enforced	Date of Notice Sent/ Outstanding as on Date of Notice	NPA Date
1.	Dhaval Kamaleshbhai Rami/ Rami Dakshaben Dhavalkumar/ (LBKAI00006201561/ LBKAI00006178373) & Banaskantha Society, Kundal, Mehsana-382715	Plot No.68, Gokuldharm, Near Jalaram Gausihala, Nava Suigam Highway, Bhabhar, Palanpur, R.S. No.255 Paiki 1/ Paiki 2, Banaskantha- 385320	March 20, 2024 Rs. 18,56,471/-	28-01-2024

Substituted service of notice atema mera agiogo. Tekalen shia aliba sen apur aser/mesüra parnok kulisür (gurantors) dang iba sangdong adoker anogo 60 tsüngta sen tanüngba ajak menoktsü metetdaksür, aji mesüra Securitisation and Re-construction of Financial Assets and Enforcement of Security Interest Act, 2002 indang ozüng nung shia aliba ama mera agütsü.

Date : May, 01, 2024
Place : Nagaland

Authorized Officer
ICICI Bank Limited

Palestine nunger Fatah aser Hamas telok China nung ajurutep

Beijing, Rongchii/April 30 (Agencies): Palestine nunger meputepi aliba Fatah aser Hamas telok China nung ajurutepa akangjungshiteptsü asoshi jembia liasü.

Beijing nung aliba Ministry of Foreign Affairs-ia telok ana nungi teshimtet nisungtem tawa ajurutepa liasü ta Hombarnü ashi. Telok ana ya küm aika toktepa aru, saka Israel-i Gaza Strip nung raraba mechi Palestine nunger lungjemshitsü asoshi maneni jembishinü akar.

Foreign Ministry indang odongtar Lin Jian-i telok ana ya China nung jembishinütsü asoshi ajurutepa indang ashi saka kodang ajurutepar mashi.

"Sensaksema aser shisa agitepa yimtenren tsütsü

akangjungshiteptsü mulunga aliba telok anaprongi lemsatep aser ken o aika jembia terenlok tajung liasü," ta pai ashi.

"China aser Palestine ya akhi mapang nungi tembar lir. Palestine nunger telok akangjungshiteptsü aser jembishinüa aser shisa lemsatepa kati ka tali yariteptsü onoki bhukumer. Iba atema onoki maneni inyaksü."

Lungjemer Palestine sorkar ka kumtettsü asoshi küm tetenzüklen telok ana nungi

teshimtet nisungtem aser danga political factions tem Moscow nung ajurutepa liasü.

2007 küm Fatah madak takok anguba sülen Hamas ya Gaza nung de facto ruler ama arur. Tir Mahmoud Abbas'er teloki parliamentary elections nung küm aika amokbanger aruba Hamas-i 2007 küm tsükdaksü aser iba election magizükba yong par den toktepa telok ya Gaza nungi meindoka liasü.

(Maneni tapak 8 nung...)

Office of the Ozüküm Ilangba Aso Mongsenyimti Mokokchung, Nagaland

KONANG NÜNGSANG AGÜTSÜR



Sd/-
Senkatemjen Ozüküm
President

Ilangba Aso züngsem tajung **Sb. MARNUNGTET**, Wb. Imoliba & Wt. Maorenla na jabaso, Queen Mary Higher Secondary School Mokokchung nungi HSSLC (Arts) examination 2024 nung Top 4 jenjang nung takok anguba tetushi tepela lemsatepber aser tenüngsang tulu agütsür. Maneni Ilangba Aso kaketshir shirnoksa HSSLC aser HSLC tatidang nung takok nguogo, nenok ajak nem tenüngsang agütsür.

Tsüngremi na aser külem kaketshirtem azükaru aser temoatsü nung teti len aniangma.

Sd/-
Supongramok
Gen. Secy.

OFFICE OF THE LONGSA KAKETSHIR TELONGJEM DIMAPUR DIMAPUR - 797112 : NAGALAND

TENÜNGSANG AGÜTSÜR

Longsa Kaketshir Telongjem Dimapur ajanga Dr. Moyajungshi Lkr aser Wt. Bendangmerenla na jala **Kr. Temjenlemla Longkumer**-i 2024 HSSLC tatidang nung Top 7(a) (Science Stream) jenjang nung takok tajung ngutetba asoshi la nem tenüngsang agütsür

Tsüngremi ne taküm aser ne tazüngba wadang nung maneni moajangma.

Sd/-
Sp. Rongsennungsang
President, LKTD



Sd/-
Kr. Imtinaro
General Secretary, LKTD

OFFICE OF THE LONGSA KAKETSHIR TELONGJEM H.Q. Longsa Village, Dist. MOKOKCHUNG - 798601, NAGALAND

TENÜNGSANG AGÜTSÜR

Longsa Kaketshir Telongjem ajanga kaketshir shirnoksa NBSE 2024 HSLC aser HSSLC tatidang nung takok tulu nguogo nenok ajak nem tenüngsang tulu agütsür. Aser maneni alakteta züngsem tajung anati tematiba jenjang ngutetba konang nüngsang tulu bener arutsü nung takoker nem tepela tenüngsang yimiyim sangoktsür.

1. Wb. Martemshi Lkr aser Wt. Toshiyangla jabaso Sp. Imtisungkum HSSLC Top 3 (Science Stream)
2. Dr. Moyajungshi Lkr aser Wt. Bendangmerenla jala Kr. Temjenlemla HSSLC Top 7 (Science Stream)

Takok agütsüba Tsüngremi nena nem maneni anu takok tuluba ngua nübertem asoshi moajangma.

Sd/-
Temjenmeren
Tir, LKT

Sd/-
Bendangsenla
Tongti Zulur, LKT

TENÜNGSANG AGÜTSÜR

Sungratsu Modanger Semchir ajanga Wb. Longtinok Jamir aser Wt. Watisangla na jabaso Sb. Imlibong Jamir, pai 2024 HSLC tatidang nung Top - 4 jenjang nung takok ngutetba asoshi konang nüngsang tulu agütsür. Tsüngremi ne taküm aser na tazüngba wadang nung maneni moajangma.

Sd/-
Wb. Lipokmenba Jamir
Secretary, Modanger Semchir

Pelaba Lemsateper



19.10.1975 - 25.04.2024

Onoki teti meima aliba Mr Rongsenshilu (Ungma) akumi tembangba anogo nungi tang tashi, ana aser talang nungi, kija, kibong aser lokti shirnokisa nübu, rongsen, shisatsü aser tamang sarasadem agi yaritepogo nenok ajak dang pelaba lemsateper.

Tsüngremi nenok temeim mapa asoshi nenok ajak moajangma.

~ Temeim Kinungertem.

OFFICE OF THE LANGPANGKONG SENSO TELONGJEM MOKOKCHUNG

TENÜNGSANG AGÜTSÜR

Langpangkong Senso Mokokchung nung aliba kaketshirtem kwinangkati taküm küm NBSE kübok 2024 HSLC aser HSSLC nung takok tajung nguogo, nenok ajak dang Mokokchung nung aliba Langpangkong Senso Telongjem den külemi Langpangkongtsür Telongjem aser Langpangkong Kaketshir Telongjem ajanga kanga pelaba den külemi tenüngsang agütsür.

Ano iba den alaktetta temaba jenjang nung takok angur,

1. **Kr. NAROLA IMSONG**
(D/o Mr & Mrs. Wati Imsong, Yaongyimsen)
HSSLC Science stream Top 1,
2. **Sb. MARNUNGTET**
(S/o Mr & Mrs. Imoliba Ozüküm, Mongsenyimti)
HSSLC Arts stream Top 4,
3. **Sb. IMEMEBO OZÜKÜM**
(S/o Mr & Mrs. Tulutoshi Ozüküm, Mongsenyimti)
HSSLC Commerce Stream Top 8.

Parnok asem-i tzükong sanger nem konang nüngsang bener arutsü nung maneni pelaba den tetushi tulu agütsür.

Langpangkong tzükong sanger Mokokchung town nung aliba kaketshirtem dang masü ano Yimtsüng aser jila balala nungia kwinangkati jenjang balala nung takok tajung nguogo, maneni nenok ajak nem tenüngsang agütsür. Tarutsü nunga takok tajung angutsüsa asen Teyanglur Tsüngrem akhüm tsübu meranga züngangni ta ajungshir.

Sd/-
IMLIMATSUNG
President, LSTM

Sd/-
TIATOSHI
Gen. Secretary, LSTM

OFFICE OF THE JANGPETKONG STUDENTS' CONFERENCE

H.Q : Alongkima, Dist:- Mokokchung : Nagaland.
Motto:- "Advancement in Unity"

TENÜNGSANG AGÜTSÜR

HSLC & HSSLC Tatidang nung takok tulu anguba asoshi item takok angur nem tenüngsang akütsür.

1. **Chendila Walling** D/o Dr. Lanuchuba, Khar.
Top-10 HSLC, Queen mary Hr.Sec. School Mokokchung.
2. **Liropong Ao** S/o Mr. Temsutoba, Khar.
Top-17 HSLC, Sacred Heart School, Mon town.
3. **Imjunglila Jamir** D/o Mr. Moakumzuk Jamir, Khar.
Top-19 HSLC, Model Hr.Sec School, Kohima.
4. **Temsujungba** S/o Mr. Imlitemjen Walling, Khar.
Top-20 HSLC, Lima Aier Hr.Sec School, Dimapur.
5. **Tiainla** D/o Lt. Akumpong, Dibuia, Top-14 HSLC, St. Mary Hr.Sec.School, Padumpukhuri Dimapur.
6. **Moakum T Longkumer** S/o Mr. Tinuyangba, Dibuia, HSLC Top-12, Edith Douglas Hr.Sec. School Mokokchung.

Manen-i HSLC & HSSLC tatidang nung Kaketshir takok angur ajak nem konang tetushi agütsür. Nenok kaketshir shisatsü bushiba nung Tsüngrem-i tali moajangma.

Sd/-
(Alemsashi)
President, JKTM.

Sd/-
(Tzurangdangla Walling)
Education & Statistic Secretary, JKTM.

METETDAKTSÜR

Longpangtsüng Ward Changtongya Town ajanga Raffle Draw koba 2nd May, 2024 anogo adoktsüba liasü, koda masüba timtem kar ajanga iba anogo nungji madoktettsüsa akümer. Kasa draw ji 2nd Aug. 2024 anogo nung adoktsü, anungji nüburtem ajaki mejashi ata alitsü mepishia metetdaksür.

Sd/-
Raffle Draw Committee

Kenya tzümetsüng lendong nung nisung 90 dak tema samara bushidar

Nairobi, Rongchii/April 30 (Agencies): Kenya nung tzümetsüng tesashi aruba sülen tekümzükertemi Mongolbarnü samara alir parnok 91 maneni bushidar.

Hombar anepdang anentsüh aser tzümetsüng aruba sülen Kenya kübok Mai Mahiu jila nung nisung 46 takümsamaogo, ta ministry-i sangdong ka ajanga metetdaksü, koba taoba mapang sangdongba dang nungi nisung ka agi timba asütsü.

Mai Mahiu jila nung lendong nungi jenbertemi tzi agi ki, gari aser railway track tem aponger aoba lemsatepa liasü.

"Ni kishi lapokba mapang tzi nongpoka aita kitchen leni ao, ta jila nung alir Anne Gachie-i ashi.

"Kübubabo kanga kara jena otet. Ajisüaka ozü jalatem tanga takdang ka nung liasü aser tzi tashi agi parnok aponger ao."

Mai Mahiu nung ano nisung 53 samar bushidar, ta interior ministry-i ashi aser Kenya Red Cross-i ashiba agi, parnok indang tracing desk-i nisung 76 samar aliba osang metetdaksüogo.

Taoba ita nungi Kenya nung tzünglu kanga sashia aruba aser iba den tzümetsüng aruba ajanga ajak senteper nisung 169 süogo. Kasa mapang nung nisung 185,000 dak tema pei ki toktsür aotsüsa kümogo, ta sorkar sangdong ka ajanga metetdaksü.

Tanzania aser Burundi na nunga tzünglu kanga sashia aruba ajanga nisung aika süogo aser meyirejang aika pei talidak ki toktsür jenshigogo. Scientist temi ashiba agi, tzi mopung melenshiba ajanga tsüngsang mopung tamajungba küma aoer.

Africa anütoklen Garissa nung hopta tatemi rong ka mekupokba sülen nisung pezü süogo aser tzümetsüng nungi nisung 23 kümzükogo aser nisung 16 samar bushidar, ta interior ministry-i metetdaksü.

Kenya nung taoba küm tzümetsüng lendong nung nisung 120 süogo. Africa anütoklen tesem timba ka tsüngsarosa agi küma aika kangshia aruba sülen tang tzünglu kanga sashia arudar.

T20 World Cup atema India team sangdongogo

Rongchii/April 30, 2024 (Agencies): Senior Selection Committee-i Mongolbarnü taruba T20 World Cup atema India team sangdongogo. Iba asayamung ya West Indies aser United States na nung June ita asayatsü.

Tanabuba wicket-keeper atema shiba shimtsü ta bilema aliba mapang KL Rahul melena Sanju Samson shimogo aser Rishabh Pant-a ita 15 shi lir India team nung züngoksemogo. Pant ya 2022 küm December ita gari tsükokba lendong ka nung kanga mejungi yiruba sülen mapang talangka masayai liasü.

Samson-i tang asaya aliba IPL nung run 385 yanglur lir

aser pa indang strike-rate 161.09 lir. Taoba mapang consistent süa masayateti aruba sülen Samson tawa kanga junga asaya arudar aser pai middle-order nung team nem teyari tulu agütsütsü.

Tang asaya aliba IPL nung Mumbai Indians captain mapa agizükba sülen junga masayateti aruaka all-rounder Hardik Pandya nem maneni vice-captain mapa agütsüogo.

Ajisüaka Shubman Gill, shiba tang IPL nung junga masayateti arudar pa Kolkata Knight Riders nungi asayar Rinku Singh den Reserves asayar ama shimogo.

World Cup nung India team June 5 nü Nassau County

International Cricket Stadium, New York nung Ireland den asaya-a tenzüksü aser iba sülen Pakistan den kasa tesem nung June 9 nü asayatsü. India team maneni USA aser Canada den June 12 aser 15 nü asayatsü.

India team: Rohit Sharma (Captain), Hardik Pandya (Vice Captain), Yashasvi Jaiswal, Virat Kohli, Suryakumar Yadav, Rishabh Pant (WK), Sanju Samson (WK), Shivam Dube, Ravindra Jadeja, Axar Patel, Kuldeep Yadav, Yuzvendra Chahal, Arshdeep Singh, Jasprit Bumrah, Mohd. Siraj.

Reserves:

Shubman Gill, Rinku Singh, Khaleel Ahmed aser Avesh Khan.

Madrid Open: Nadal round of 16-i iogo



Rongchii/April 30, 2024

(Agencies): Madrid Open tebur kija asaya nung Hombarnü Rafael Nadal Argentina nung Pedro Cachin 6-1, 6-7 (5/7), 6-3 agi kokogo.

Asaya nungi manen tsüngda kidang tatembangbuba asayamung asayaba mapang Nadal-i pa indang tola Cachin nem agüja liasü.

Arishi küm 37 tain asayar ya yiruba ajanga taküm tang tashi nung asaya ti nung dang asayar lir.

Tebur kija asaya nung ano Top-seeded asayar Jannik Sinner-i world number 72 asayar Pavel Kotov 6-2, 7-5 agi kokogo.

Kazakhstan nung asayar Alexander Bublik-i 3-6, 7-6 (7/2), 6-4 agi America nung asayar Ben Shelton kokogo aser pa round pezübuba nung Daniil Medvedev den asayatsü.

Kasa asayamung tetsür kija asaya nung 2022 küm iba asayamung koker alila Jabeur-i, 6-0, 6-4 agi Jelena Ostapenko

kokogo.

Maneni Top-seeded asayar Iga Swiatek-i mezüngbuba game makokba sülen asaya 12 atonga koka Sara Sorribes Tormo 6-1, 6-0 agi kokogo aser la quarter-final nung Brazil tsür Beatriz Haddad Maia den asayatsü.

Tetsür kija asaya nunga Kyes-i külem America tsür Coco Gauff 7-6 (7/4), 4-6, 6-4 agi koka tang mezüngbuba Madrid nung quarter final tongtetogo.

Arishi küm 29 tain asayar ya tapu yiruba ajanga ita pezü tashi masayai lir tang takok ngua asayadar.

Quarter-finals-i aiertem rongnung Mirra Andreeva-a densema lir. Lai Italy tsür Jasmine Paolini 7-6 (7/2), 6-4 agi koka WTA nung mezüngbuba asayaba mapang round pezübuba tongtetogo.

La taruba round nung Belarus tsür Aryna Sabalenka den asayatsü shibai 4-6, 6-4, 6-3 agi America tsür Danielle Collins kokogo.

Season tembangba sülen Thiago Silva-i Chelsea toktsütsü



Rongchii/April 30, 2024 (Agencies): Brazil nung defender Thiago Silva-i season tembangba sülen Chelsea toktsütsü. Pa Chelsea nungi season pezü asayaogo.

Silva-i iba osang ya Hombarnü Chelsea indang website nung video ka ajanga lemsatapa liasü.

Arishi küm 39 tain centre-

back ya 2020 küm August ita free transfer ka ama Paris Saint-Germain toktsüba sülen iba Premier League club nung dena liasü.

Pa Chelsea nungi tetoktepba ajak nung 151 ben asayaogo aser iba mapang Champions League, FIFA Club World Cup aser UEFA Super Cup kokogo.

"Chelsea ya kü atema kanga tongtibang lir. Ni küm ka atema dang aru saka küm pezü asayaogo," ta pai ashi.

"Ozü jabasotem Chelsea atema asayar anungji Chelsea kibong nung densemba ya nemadangtsü tulu lir. Parnok maneni iba club nungi asayatsü imlar atar, kong asayartem aikati asayaner," ta Thiago-i ashi.

"Küm pezü tsüngda ni akokba tashi kecha anungzüka

meyui meranga asayaogo, ajisüaka tia maka ajak tetenzükdak, teyongtsü aser tatembang ka lir," ta pai ashi.

2020-21 Champions League akokba mapang togtibang shilem agiba sülen Silva ya Chelsea fan temi kanga sakloka aküm.

Mauricio Pochettino-i aniba team ya tang asaya aliba season nung asaya pongu anunga lia European qualification nung densemstü atema kanga meranga asayaba mapang ka lir.

Chelsea pur Premier League nung tang jenjang tekububa nung lir. Parnok FA Cup semi-finals nung Manchester City-i tsükdaktsü aser February ita League Cup final nunga Liverpool-i tsükdaktsüogo.

India nung 2025 BWF World Junior Championships asayatsü

Rongchii/April 30, 2024 (Agencies): India-i ayongzüka taruba küm National Centre of Excellence Guwahati nung World Junior Badminton Championships asayatsü, ta BWF-i Mongolbarnü metetdaktüsü.

2008 küm sülen tang mezüngbuba Badminton World Federation (BWF) asayamung ka India nung asayatsü.

"Team aser kija asaya ajak linük kübok northeast nung Badminton Association of India's (BAI) National Centre of Excellence nung asayatsü,"

ta BWF-i ashi.

India-i iba asayamung ya Pune nung ayongzüka asayaogo.

"India nung badminton asayar tajungtem aika adokdar aser tang agi tanabenbuba World Juniors India nung ayongzüka asayatsü ya kanga tongtibang lir," ta BWF tir Poul-Erik Høyer-i ashi.

"BAI indang National Centre of Excellence tasenba ya badminton atema state-of-the-art facility ka lir aser lanur asayartem kija aser team tetoktepba nung temaba jenjang atema tokteptsü asoshi iba ya

tesem tajung ka asütsü," ta paisa ashi.

Iba asayamung atema anogo ano tang tashi melemteti lir.

Kasa mapang nung BWF Thomas & Uber Cup Finals Horsens, Denmark nung asayatsü.

Denmark nung tang agi tanabenbuba BWF world tebur aser tetsür team championships ayongzüka asayatsü. 2021 küm Aarhus nung iba asayamung ayongzüka asaya liasü.

Asayamung ayongzüka asayatsü atema April 28 nü BWF Council meeting nung temelaba agüja liasü.

Season tatem Thomas Tuchel-i Bayern Munich yutsütsü

Munich, Rongchii/April 30 (Agencies): Bayern Munich boss Thomas Tuchel-i ashiba agi, pa club nung alitsü asüngdanga petition züluba nem pa memesüzükdaktsütsü.

Arishi küm 50 tain Tuchel ya Allianz Arena nung alitsü atema petition züluba nung nisung 12,000 dak temai meyonngem agütsüogo. Tuchel ya contract tembangtsü küm ka lia taküm season tatem club yutsütsü ta

Bayern-i February ita sangdonga liasü.

"Parnoki (fans) na lidaktsünüba onük ya kü atema tajung süaka, ibai mezüng sür inyaktsüba masü," ta Tuchel-i ashi.

"Iba nungya temulung magütsükdaktsütsü. Tanü nungi anogo 11 tsüngta ibai football dak alaka danga kecha indanga masütsü. Tajunga süang, tamajunga süang, iba nem ni memesüzükdaktsütsü."

Taoba mapang Manchester United indang interim manager inyaka alisang Ralf Rangnick ya taküm meyi mapang taoba Chelsea manager Tuchel melentsü asoshi Bayern den jembishinüa arur.

Pa melener shimtsü club mapa lir aser item jembishinü mangashitsü atema kü indang headphones "noise-cancelling mode" nung yua lir, ta Tuchel-i ashi.

BENDANGLI OSANG : Tapak 7 nungi...

Palestine nung Fatah aser Hamas...

Külen Fatah-i aniba Palestinian Authority ya occupied West Bank nung tesem kar nung dang par tashi amshiteter.

China yagi akhi mapang nungi Palestine nung dang temeim sayua arur aser Israel-Palestine rara nunga 'two-state solution' mulunger.

October 7 nü Hamas-i Israel arütsü alema aita nisung 1,139 shi tepsetba sülen Israel-Gaza rara adokli nungi Beijing-i ceasefire alitsü ayongzüka arur.

Hamas aser danga telungpur teloki kasa mapang nisung 250 shi pua bener ao aser ano aika tang tashi Gaza nung pua yua lir. Iba mapa tamajung inyakba nung telangzüba agüja Israel sepaitemi Gaza Strip nung tetsür aser tanur timba sür nisung 34,535 shi tepsetogo, ta Gaza nung aliba health ministry ajanga ashir. China Tir Xi Jinping-i iba rara temdaktüsü asoshi "international peace conference" ayongzüksü jembia arur.

BILEMDANGANG

"Tia tensa ajak nung tajung reprangtetsü merangang."